



Suleqatigiissitamik immikkut ilisimasalinnik inuttaqartumik meeqqat atuarfiannik iluarsaaqqinnissamut kaammattuutitalimmik nalunaarusiortussamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanut tunngasunik kaammattuutit saniatigut nalunaarusiaq meeqqat autissemik; ADD/ADHD-mik annilaangasarnemillu nappaateqartunut sammisumik meeqqat atuarfianni immikkut ilinniartitsinernut neqeroorutitut kaammattuutinik imaqassaaq. Nalunaarusiaq UKA 2025-imut atatillugu Inatsisartunut agguanneqassaaq.

(natsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Inatsisartunut ilaasortaq Anna Wangenheim siunnersuummut uunga pitsaasumut.

Meeqqat atuarfiat meerartatta siunissaanut toqqammaviuvoq inuunermilu periarfissaannut apeqqutaasorujussuulluni. Taamaattumik pisariaqarpoq, meeqqat atuarfianni fagitigut inuttullu avatangiisit nukittorsarnissaat. Suleqatigiissitanik immikkut ilisimasalinnik inuttaqartunik pilersitsinissamik siunnersuut, meeqqat atuarfiata aqqissuuteqqinneqarneranut innersuussisartussanik, ersarissumik takutinneqarpoq piunassuseq ajornartorsiutip qitia aallaaviginiarneqartoq aaqqiissutissanillu nassaarniartoqarniartoq, atuarfimmik pilersitsisumik, meeqqat tamarmik, qanorluunniit tunuliaqutaqaralarunik qanorluunniillu pisariaqartitsigalarunik, iluarusullutik inuuffigisinnaasaannik naammattumillu ineriartuutigisinnaasaannik.

Ullumikkut annertuumik unamminartipparput, atuartut amerlavallaat meeqqat atuarfiat qimattarmassuk ilikkagassatik pisariaqartut pinngitsoorlugit, suliffiit pisariaqartitaat. Uagut akisussaaffigaarput qulakkiissallugu, atuartut tamarmik tunngaviummik piginnaasaqalernissaat fagini soorlu matematikkimi, kalaallisuumi, tuluttuumi aammalu inuiaqatigiilerinermi. Meeqqat atuarfiannik pilersitsinissarput pisariaqartipparput, atuartunik tamanik periarfissiinissamut qaamasumillu siunissaqartitsinissamut nukissaqartumik.

Meeqqanut immikkut pisariaqartitsisunut aammattaaq pingaartuuvoq, unamminartitaasa immikkuullarissut akuersaarnissaat atuartitsinerlu tulluussarlugu immikkut ittumik piunasaqarnerat aallaavigalugu. Siunnersuut meeqqat atuarfianni immikkut perorsaarnemik neqerooruteqarnissaq ilanngunneqassasoq taamaattumik aamma pingaaruteqartorujussuuvoq. Taamaaliornerup qulakkeersinnaavaa, meeqqat autissemik, ADHD-mik annilaanganemillu nappaateqartut pisariaqartitaminnik tapersorneqarnissaat atuarfimmik atugarissaarnissaminnut tamannalu aqqutigalugu ilisimasanik sakkussanillu pissarsillutik, aamma ulluinnarni atorsinnaasaminnik kingusinnerusukkut inuunerminni. Demokraatit isumaqarput, meeqqat atuarfiata neqeroortugisariaqaraa sinaakkutit allanngorartinneqarsinnaasut, meeqqap atugarissaarnissaannik qitiutitsisussat. Ilimagilluinnarparpummi, meeqqat ilikkajannerussasut, inuunerissuugunik.

Meeqqat atuarfiata aqqissuuteqqinnera iluatsilluassappat piunasaqaataavoq, allatut eqqarsarnissamut



sapiissuseqartariaqartugut nunatsinneersut nunanilu allaneersut immikkut ilisimasallit misilittagaat akuutittariaqarigut. Suleqatigiissitamik immikkut ilisimasalinnik inuttaqartumik pilersitsinissamik siunnersuuteqarnikkut immaqa pilersitsisinnaassaagut aaqqissuussamik, fagitigut qaffaanissamik ukkatarinnissinnaasumik aammattaarlu tassunga ilutigalugu akuutitsisumik atuarfeqarnermik qulakkeerinnittussamik, atuartut assigiinngisitaartumik atuartinneqarsinnaallutik perorsaariaatsillu nutaaliaasut atorlugit. Nutaalianik aaqqiissutissanik nassaartariaqarpugut, qanoq ililluta meeqqat assigiinngitsunik pisariaqartitsisut ataatsimoortumik atuartinneqarsinnaaneritut peqataalersissinnaanerlugit aammalu tassunga ilutigalugu atugarissaarnek ilinniagaqarnerlu siuarsarlugit.

Naggataarutaasumik erseqqissaqqissavara, Demokraatit meeqqat atuarfiat, meerartatta inuusuttortattalu pitsaanerpaamik siunissaqarnissaannik suliniuteqarsinnaasoq, kissaatigimmassuk. Uuminnga siunnersuummik pitsaasumiit Anna Wangenheim-imit siullerpaamik alloriarsinnaanngorpugut atuarfimmut, atuartuutiminut tapersersuillunilu piginnaasanut pisariaqartitaannik tunisisinnaasumut. Tamanna atuartunut iluaqutaassaaq aammalu inuiaqatigiitsinnut tamarmiusumut.

Siunnersuutip akuerineqarnissaa innersuussutigalugu ataatsimiititaliami susassaqartumi suliareqqinneqarnissaa innersuussutigaarput.